



PATNUBAY SA MISA



20 Abril 2014

LINGGO NG PASKO NG MULING PAGKABUHAY

Taong A


SI KRISTONG ATING PAG-ASA AY NABUHAY NA MULI! ALELUYA!

Isang Maligayang Pasko ng Pagkabuhay sa inyong lahat!

Pinupuspos ng galak ng Muling Pagkabuhay ang ating mga puso at inuudyukan tayong iba-hagi ito sa lahat ng ating mga kapatid. Tunay na kahanga-hanga ang naganap hindi lamang kay Hesus kundi pati sa atin: tayo ay bumangon sa isang bagong buhay. Iniwan na natin ang ating mga pagdaralita at kahinaang moral, at tayo'y naging kabahagi ng bagong buhay na iniaalay ni

Hesus para sa lahat ng dumadambana sa kanya bilang Panginoon ng kanilang puso.

Sa araw na ito, nagtiitipon tayo upang mag-alay ng nagpapasalamat na papuri sa Biktimang Pampaskuwa na siyang Prinsipe ng Buhay at walang hanggang naghahari sa kasalanan at kamatayan. Siya ang dahilan ng ating kagalakan. Siya ang pinagmumulan ng ating kapayapaan at ng ating matibay na hangaring maging mas mabubuting Kristiyano.



N.B.: Sa lahat ng mga Misa ngayong araw na ito, ang Pagsisisi at ang Sumasampalataya ay lalaktawan; ang mga ito ay nasasaad na sa Pagsasariwa sa Pangako ng Binyag.

PASIMULA



Pambungad

(Ipahayag lamang kung walang awiting nakahanda.)

Ang Panginoon'y nabuhay! Pag-hahari't karangalan ay kanya mag-pakailanman. Aleluya! Ipagdangal ang kanyang kadakilaan.

Pagbati

P—Purihin si Hesukristo na mata-gumpay na bumangon mula sa kamatayan. Ang kanyang pagpa-pala at kapayapaan ay sumainyong lahat!

B—At sumaiyo rin!

Papuri

B—Papuri sa Diyos sa kaitaan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bug-tong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan.

Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalangiang Pambungad

P—Ama naming makapangyarihan, ngayo'y binuksan mo para sa amin ang pinto ng kalangitan sa pananaig ng iyong Anak sa kamatayan. Ipagkaloob mong sa pagdiriwang namin sa Pasko ng Pagkabuhay kami'y mabuhay sa pagpapanibagong dulot ng iyong Espiritu sa kaliwanagan ng buhay

mo, sa pamamagitan ni Hesukristo kasama ng Espiritu Santo magpapasawang hanggan.

B – Amen!

PAGPAPAHAYAG NG SALITA NG DIYOS



Unang Pagbasa Gw 10:34.37-43

Ang muling pagkabuhay ni Hesus ang pinakadiwa ng “Magandang Balitang” dinala ni Pedro kay Cornelio. Sa katotohanang ito nakasalig ang ating kaligtasan at ang lahat ng ating pinaniniwalaan tungkol sa Nagkatawang-taong Anak ng Diyos.

L – Pagpapahayag mula sa mga Gawa ng mga Apostol

Noong mga araw na iyon, nag-salita si Pedro, “Alam ninyo ang nang-yari sa buong Judea na nagsimula sa Galilea nang mangaral si Juan tungkol sa binyag. Ang sinasabi ko’y tungkol kay Hesus na taga-Nazaret. Ipinagkaloob sa kanya ng Diyos ang Espiritu Santo at ang kapangyarihan bilang katunayan na siya nga ang Hinirang. Sapagkat sumasakanya ang Diyos, saanman siya pumaroon ay gumagawa siya ng kabutihan at nagpapagaling sa lahat ng pinahirapan ng diyablo. Saksi kami sa lahat ng ginawa niya sa lupain ng mga Judio at sa Jerusalem. Gayunman, siya’y ipinako nila sa krus.

Ngunit muli siyang binuhay ng Diyos sa ikatlong araw. Napakita siya, hindi sa lahat ng tao kundi sa amin lamang na noon pang una’y pinili na ng Diyos bilang mga saksi. Kami ang nakasama niyang kumain at uminom pagkatapos na siya’y muling mabuhay.

Inatasan niya kaming mangaral sa mga tao at magpatotoo na siya ang itinalaga ng Diyos na maging Hukom ng mga buhay at mga patay. Siya ang tinutukoy ng mga propeta nang kanilang ipahayag na bawat mananalig sa kanya ay tatanggap ng kapatawaran sa kanilang mga kasalanan, sa pamamagitan ng kanyang pangalan.”


Ang Salita ng Diyos!

B – Salamat sa Diyos!

Salmong Tugunan Awit 117

B – Araw ngayon ng Maykapal, magalak tayo’t magdiwang!

R. M. Velez



* O pasalamatang ang D'yos na Panginoon, pagkat siya'y mabuti; ang kanyang pag-ibig ay napakatatag at mananatili. Ang taga-Israel, bayaang sabihin't kanilang ihayag, “Ang pag-ibig ng Diyos ay hindi kukupas.” **B.**

* Ang lakas ng Poon, ang siyang nagdulot ng ating tagumpay sa pakikibaka sa ating kaaway. Aking sinasabing di ako papanaw, mabubuhay ako upang isalaysay ang gawa ng Diyos na Panginoon ko. **B.**

* Ang batong natakwil ng nangagtatayo ng tirahang-bahay, sa lahat ng bato'y higit na mahusay. Ang lahat ng ito ang nagpamalal ay ang Panginoong Diyos. Kung iyong mamasdan ay kalugud-lugod. **B.**

Ikalawang Pagbasa Co 3:1-4

Ipinaaalala sa atin ngayon ni San Pablong marapat nating patunayan sa ating asal ang muling pagkabuhay ni Kristo.

L – Pagpapahayag mula sa Sulat ni Apostol San Pablo sa mga taga-Colosas

Mga kapatid: Binuhay kayong muli, kasama ni Kristo, kaya't ang pagsumakitan ninyo ay ang mga bagay na nasa langit na kinaroroonan ni Kristo na nakaupo sa kanan ng Diyos.

Isaisip ninyo ang mga bagay na panlangit, hindi ang mga bagay na panlupa, sapagkat namatay na kayo at ang tunay na buhay ninyo'y natatago sa Diyos, kasama ni Kristo. Si Kristo ang tunay na buhay ninyo, at pag siya'y nahayag, mahahayag din kayong kasama niya at makakahati sa kanyang karangalan.

Ang Salita ng Diyos!

B – Salamat sa Diyos!

Awit Tungkol sa Mabuting Balita

C – Kasama ang sinaunang makata, ipahayag natin ang galak ni Maria Magdalena sa Muling Pagkabuhay ni Hesus.

B – Purihin si Hesukristo, hain para sa tao. Nagligtas na Kordero nang makasundo tayo ng Amang Lumikha nitong mundo. Buhay at kamatayan kapwa nagtunggalian at ang nagtagumpay “Pagkabuhay.”

Ano ba, Maria, ang 'yong mga nakita? Puntod ni Kristong nabuhay, liwanag niya't kaningningan. Anghel na malinaw, kumot at kasu-utan. Buhay si Kristong pag-asa, pupunta s'ya sa Galilea. Kami'y sumasampalatayang buhay kang talaga, Hari ng ligaya, magbasbas ka.

Aleluya

1 Cor 5:7b-8a

B – Aleluya! Aleluya!

Si Kristo'y inihain na pamakong maamong tupa. Magsalo tayo sa kanya.

Aleluya! Aleluya!

Mabuting Balita

Jn 20:1-9

Ang pagtanggap sa katotohanan ng Muling Pagkabuhay ay isang mahabang proseso, tulad ng malalaman natin sa salaysay ngayon tungkol sa pagkatuklas sa libingang walang laman. Ang pagkawala ng katawan ni Hesus at ang pagkakatagay ng mga kayong lino sa libingan ay mga tandang nagpapaniwala kina Juan at Pedro.

P – Ang Mabuting Balita ng Panginoon ayon kay San Juan
B – Papuri sa iyo, Panginoon!

Madilim-dilim pa nang araw ng Linggo, naparoon na si Maria Magdalena sa libingan. Naratnan niyang naalis na ang batong panakip sa pinto ng libingan. Dahil dito, patakbo siyang pumunta kay Simon Pedro at sa alagad na mahal ni Hesus, at sinabi sa kanila, “Kinuha sa libingan ang Panginoon at hindi namin alam kung saan dinala!”

Kaya't si Pedro at ang nasabing alagad ay nagpunta sa libingan. Kapwa sila tumakbo ngunit si Pedro'y naunahan ng kasamang alagad. Yumuko ito at sumilip sa loob. Nakita niyang nakalagay ang mga kayong lino, ngunit hindi siya pumasok. Kasunod niyang dumating si Simon Pedro at tuluy-tuloy itong pumasok sa libingan. Nakita niya ang mga kayong lino, at ang panyong ibinalot sa ulo. Hindi ito kasama ng mga kayong lino, kundi hiwalay na nakatiklop sa isang tabi. Pumasok din ang alagad na naunang dumating; nakita niya ito at siya'y naniwala. Hindi pa nila nauunawaan ang nasasaad sa Kasulatan, na kailangang muling mabuhay si Hesus.

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Pagsasariwa sa Pangako sa Pagbibinyag

K– *Gaganapin ang Pagsasariwa sa Pangako ng Pagbibinyag sa halip na Pagpapahayag ng Pananampalataya.*

P–Mga kapatid, sa misteryo ng Pasko ng Pagkamatay at Pagkabuhay ni Kristo, tayo’y nalibing kasama niya noong tayo’y binyagan upang kasama rin niya tayo’y makabangon at makapagbagong- buhay. Naganap na natin ang Apatnapung Araw na Paghahanda, kaya’t sariwain natin ngayon ang ating pangako sa pagbibinyag. Talikdan natin ang kasamaan at kasalanan. Harapin natin ang matapat na paglilingkod sa Diyos bilang mga maaasahang kaanib ng kanyang banal sa Simbahang Katolika. Kung kayo’y makapangagakong tatalikod sa lahat ng hadlang sa katuparan ng panukala ng Diyos upang kayo’y makapamuhay bilang matapat at maaasahang kaanib ng kanyang angkan, pakisagot ninyo itong tatlong katanungan:

P–Para kayo makapamuhay bilang mga malayang anak ng Diyos, ang kasalanan ay itinatakwil ba ninyo?

B–**Opo, itinatakwil namin!**

P–Para kayo’y huwag mapailalim sa kasalanan, ang kaakit-akit na tukso ng kasamaan ay itinatakwil ba ninyo?

B–**Opo, itinatakwil namin!**

P– Si Satanas na pinanggagalangan ng kasalanan at pinuno ng kadiliman ay itinatakwil ba ninyo?

B–**Opo, itinatakwil namin!**

P– Ngayon nama’y ating harapin ang ating pananampalataya. Kung kayo’y makapangagakong magsisikap mamuhay bilang mga ikinararangal na anak ng Diyos Ama, kung tutularan ninyo siya sa kanyang kabutihan, pagmamahal sa lahat, at pagmamalaskit para sa pangkalahatang kapakanan, pakisagot ninyo ang katanungang ito: Sa Diyos Amang makapangyarihan sa lahat at Lumikha ng langit at lupa, kayo ba ay sumasampalataya?

B– **Opo, sumasampalataya kami!**

P– Kung kayo’y makapangagakong magsisikap mamuhay bilang mga tunay na kapatid ng Panginoong Hesus, kung gagawin ninyong simulain sa buhay ang kanyang katwiran, katarungan, at paglilingkod sa lahat alinsunod sa kanyang pagmamahal, pakisagot ninyo ang katanungang ito: Sa iisang Anak ng Diyos, ang ating Panginoong Hesukristo, na ipinanganak ni Santa Mariang Birhen, ipinako sa krus, namatay, inilibing, muling nabuhay at naluluklok sa kanan ng Ama, kayo ba ay sumasampalataya?

B–**Opo, sumasampalataya kami!**

P–Kung kayo’y makapangagakong susunod sa patnubay ng Espiritu Santo at kung sisikapin ninyong mapaunlad ang kaloob niyang buhay at pagmamahal upang maging mga maipagmamalaking anak ng Diyos Ama at kapatid ng Panginoong Hesus, pakisagot ninyo ang katanungang ito: Sa Espiritu Santo, sa Banal na Simbahang Katolika, sa kasamahan ng mga banal, sa kapatawaran ng mga kasalanan, sa muling pagkabuhay ng mga namatay, at sa buhay na walang hanggan, kayo ba ay sumasampalataya?

B–**Opo, sumasampalataya kami!**

P–Bunga ng pagmamahal ng Diyos na makapangyarihang Ama ng ating Panginoong Hesukristo, tayo ay pinatawad sa ating kasalanan noong tayo’y muling isilang sa tubig at Espiritu Santo. Tulungan nawa niya tayong mamalaging tapat sa ating Panginoong Hesukristo ngayon at magpasawalang hanggan.

B–**Amen!**

[Babasbasan ng pari ang mga nagsisimba habang inaawit ang angkop na awitin.]

Panalangin ng Bayan

P– Pinupuspos tayo ng galak at pag-asa ng mensahe ng Pasko ng Pagkabuhay. Nadarama natin ang tapat na hangaring magpanibagong buhay na may katapatan, kalinisan, pagtatalaga at pag-ibig. Hingin natin sa Panginoon na ang lahat ng ito’y magkaroon ng katuparan habang idinadalingin natin:

B– **Panginoon, dinggin Mo kami!**

* Upang ang sambayanan ng mga mananampalataya ay magbigay saksi sa muling pagkabuhay ni Kristo sa pamamagitan ng kanilang patuloy na pagbabagong-loob, manalangin tayo! **B.**

* Upang ang Santo Papa, ating Obispo, at lahat ng ating mga pinunong espirituwal ay magtamo ng kasiyahan at kapayapaang buhat sa muling pagkabuhay ni Kristo, manalangin tayo! **B.**

* Upang ang mga nasa madilim na libingan ng kasalanan ay makatagpo sa Muling Pagkabuhay ng lakas upang mamuhay nang tapat sa Ebanghelyo, manalangin tayo! **B.**

* Upang ang mga nasisiraan ng loob sa di-masupil na karahasan, paniniil at paghihirap ay makatagpo sa Muling Pagkabuhay ng kinakailangang lakas ng loob upang magpatuloy sa pagtatatag ng isang matinong lipunan, manalangin tayo! **B.**

* Upang tayong lahat ay makatanggap ng pagpapala ng Muling Pagkabuhay – isang malalim na pagpapanibago sa ating pagpapahalagang moral, panlipunan, pangkabuhayan at pulitikal na mga institusyon, manalangin tayo! **B.**

* Ipanalangin natin ang ating mga pansariling kahilingan. (*Tumahimik sandali.*)

Manalangin tayo! **B.**

P– Panginoong Diyos, ang kainingningan nawa ng Muling Pagkabuhay ni Kristo ang tumanglaw lagi sa aming mga buhay. At ang aming mga kaisipan, salita at gawain nawa ang magpatotoo sa bagong buhay na ipinagkaloob Mo sa amin. Isinasamo namin ito sa ngalan ni Hesukristong aming Panginoon.

B–**Amen!**



P– Manalangin kayo . . .

B– **Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.**

Panalangin ukol sa mga Alay

P– Ama naming Lumikha, ma-saya naming ipinagdiriwang ang Pasko ng Pagkabuhay ngayong aming ginaganap ang paghahaing ito ng Anak mong mahal, para sa muling pagsilang at pakikinabang ng iyong Sambayanan, sa pamamagitan niya kasama ng Espiritu Santo magpasawalang hanggan.
B– Amen!

Prepasyo

P– Ama naming makapangyarihan, tunay ngang marapat na ikaw ay aming pasalamatano lalo ngayong ipinagdiriwang ang paghahain ng Mesiyas, ang maamong tupa na tumubos sa aming lahat.

Ang iyong Anak na minamahal ay naghain ng sarili niyang buhay. Siya ang tupang maamong umako sa kaparusahan upang mapatawad ang kasalanan ng sanlibutan. Sa pagkamatay niya sa banal na krus, ang kamatayan namin ay kanyang nilupig. Sa pagkabuhay niya bilang Manunubos, pag-asa't pagkabuhay ay aming nakamit.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B– Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B– Sa krus mo't pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.

PAKIKINABANG



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos na nag-aalis ng kasalanan ng sanlibutan, maawa ka sa amin. (2x)

Kordero ng Diyos na nag-aalis ng kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P– Ito si Kristong Muling Nabuhay, ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(*Ipahahayag lamang kung walang awiting nakahanda.*)

Si Kristo'y inialay na Pamaskong maamong tupa. Magsalo tayong masaya sa tinapay na pamista, bago't wagas. Aleluya!

Panalangin Pagkapakinabang

P– Ama naming mapagmahal, lingapin mong lagi kaming sambayanan mo upang sa ipinagdiriwang naming Pasko ng Pagkabuhay ni Kristo sapitin namin ang kaliwanagan ng pagkabuhay sa piling mo, sa pamamagitan niya kasama ng Espiritu Santo magpasawalang hanggan.

B– Amen!

PAGWAWAKAS



P– Sumainyo ang Panginoon.

B– At sumaiyo rin!

P– Magsiyuko kayo at ipanalangin ang pagpapala ng Diyos. (*Manahimik sandali.*)

Sa pamamagitan ng muling pagkabuhay ng Kanyang Anak, pinagaling tayo ng Diyos. Matupad nawa ang Kanyang mga pangako at pagkalooban kayo ng buhay na walang hanggan.

B– Amen!

P– Itinangis ninyo ang mga pagdurusa ni Kristo; ipinagdiriwang ninyo ngayon ang kanyang muling pagkabuhay. Dumulog nawa kayo nang buong galak sa kapistahang walang hanggan.

B– Amen!

P– Kaawaan nawa kayo ni Kristong Muling Nabuhay ngayong Pasko ng Pagkabuhay at iligtas kayo sa lahat ng masama.

B– Amen!

P– Pagpalain kayo ng makapangyarihang Diyos: Ama at Anak at Espiritu Santo.

B– Amen!

P– Taglayin ninyo sa inyong pag-alis ang kapayapaan ni Kristo. Aleluya! Aleluya!

B– Salamat sa Diyos!
Aleluya! Aleluya!



Makinig sa Radyo Totoo (846 kHz) tuwing Sabado ala-5:00 hanggang ala-6:00 ng gabi, at makibahagi sa "BISPERAS SA VERITAS" – ang masigla't "interactive"

na palatuntunang pantulong para tuklasin ang mensahe ng Salita ng Diyos para sa ikatatatag ng inyong buhay, mag-anak, at pamayanan.

Veritas846
RADIO TOTOO

Makinig.



WORD & LIFE PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

E-mail: marketing@wordandlife.org, wordandlifepublications@gmail.com • FB: Word & Life Publications

Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molomog, D. Daguio, V. David, M. Navajas • Illustrations: A. Sarmiento, B. Cleofe • Circulation: F. Edjan